

Акафист Пресвятой Богородице в честь иконы Озерянская

Празднование 12 ноября (30 октября)

Кондак 1

Взбранной Воеводе, невечерняго Света Родительнице, Божественное знамение спасения – Христа Богомладенца – на руку Своею держащей, молитвам Церкви земныя внемлющей, струи животворныя от явленныя иконы Своея Озерянския всем верным источающей, благодарственная восписуем Ти раби Твои, Богородице. Но яко имущая державу непобедимую, от всяких нас бед свободи и щедротами Сына Твоего души наша озари, да зовем Ти:

Радуйся, благословенная в женах Богородице, светом любви Христовой нас озаряющая.

Икос 1

Архангел Гавриил, спасение наше предвозвещающая, благословенную в женах пронарече Тя, Богородице. Мы же, благовестнику Бога Вышняго внемлюще, велию таинству дивящися, радуемся, Тя, знамение лика Своего Озерянскаго нам даровавшую, Матерь Господа нашего исповедуем и, яко Матери милосердия и щедрот, со благоговением вопием Ти:

Радуйся, священное сокровище славы Божией, свещеносно во Свята Святых введенная; радуйся, благоволения Божия предображение и человеков спасения проповедание. Радуйся, пророческих

проречений сбытие многоценное, Христа всем предвозвестившая; радуйся, о Тебе бо Небесная вся удивишася, зряще Духа Святаго в Тя всельшася. Радуйся, главизно нашего спасения, Триипостасное Божество в едином естестве всему миру явившая; радуйся, Отроча Младо, Отчее Сияние, мир просветившее, нам родившая. Радуйся, Мати Пречистая, прежде рожества и по рожестве Дева пребывшая; радуйся, яко о рожестве Сына Твоего вси земнороднии, спасающесе, возвеселишася.

Радуйся, благословенная в женах Богородице, светом любви Христовой нас озаряющая.

Кондак 2

Видя благочестивый муж веси Озерянския, егда изыде на делание свое, святую икону Твою, Владычице, внезапно косою его разсеченную, со слезами умиления к лику Твоему повержесе и со благоговением разсеченныя части в дом свой принесе, слезно прося умилоствления о гресе своем. Егда же воутрии сих не обрете, страхом и скорбию объят бысть, помысли бо гневу Божию на доме своем быти, со умилением возопи Богу: Аллилуия.

Икос 2

Разумети хотя тайны сея силу, еуже сокрыся из дому его святая икона Твоя, Владычице, муж сей на место разсечения ея ускори. И егда же паки сращенну сию обрете, знамение велие в сем уразуме, о немже иерею Феодору поведа, и людем веси Озерянския о чудеси велием возвести. Тии же о Твоем, Богомати, милосердии слышавше, гласом

радования благодарне возопиша: «Откуда нам сие, да Мати Господа нашего к нам прииде!» Сице умиляющесе, воспеваху Ти таковая:

Радуйся, Благодатная, Господь с Тобою, Имже мир от греха спасесе; радуйся, благословен бо Плод чрева Твоего, Имже глава змиева сокрушися. Радуйся, Церкви Христовы, седмию Вселенскими Соборы утвержденная, присное украшение; радуйся, веры Православныя, Духом Святым ограждаемая, непоколебимое утверждение. Радуйся, Препрославленная, во дни нашествия иноплеменник всемошно нас охраняющая; радуйся, мольбы верных Своих, пред пречистым Твоим образом приносимая, милостиво приемлющая, Радуйся, сращением святых иконы Твоея мужа праведна зело возвеселившая; радуйся, разсеченное диаволом естество наше рождеством Сына Твоего паки с Богом соединившая.

Радуйся, благословенная в женах Богородице, светом любви Христовой нас озаряющая.

Кондак 3

Сила благодати неисповедимая не токмо от святых иконы Твоея, Пречистая, верным источашесе, но и во источнице, на месте чуднаго явления ея, хромым хождение, глухим слышание, слепым прозрение обильно подавашесе. Тако бо Твоего Матерняго милосердия бездну неизследимую людие видевшие, от недугов душевных и телесных исцеляхуся, сердца же своя в любви Божией утверждаху, с веселием поюще Ему: Аллилуия.

Икос 3

Имея сие неописуемое сокровище веры – Твоего, о Богомати, лика пречистаго благословение, и в нем покров и земли нашае благодатное украшение, иерей Божий Феодор, умиляся, все имение свое разда и в пределах веси Озерянския, святую обитель, храмину лику Твоему, со пустыннолюбцем Севастианом воздвиже, себе же в жертву живую, еже иночествовати в ней, Сыну Твоему и Богу нашему приведе, идеже со иными пустыннолюбцы о Тебе, Благодатная, радуяся, сынолюбно воспе таковая:

Радуяся, Мудрость, Слово и Силу – Сына Отча, из Тебе воплотившагося, миру явившая; радуяся, Христа, Пасху нетленную мертвым, живым и грядущим уготовившая. Радуяся, Владычице милостивая, Свой Божественный покров на нас простирающая; радуяся, голубице чадолюбивая, утешение благое в сердца наша низпосылающая. Радуяся, покрове ширший облака, явлением иконы Твоея милостивно нас посетившая; радуяся, любвеобильная Мати, землю Харьковскую благодатно освятившая. Радуяся, Божия Слова предивное селение, град наш и люди от нашествия вражия охраняющая; радуяся, незримая путеводительнице, к Небесному Отечеству нас руководящая.

Радуяся, благословенная в женах Богородице, светом любви Христовой нас озаряющая.

Кондак 4

Бурю житейских скорбей и напастей в людех утолити хотящи, святую икону Твою на утешение нам

даровала еси, Владычице, юже, аки Саму Тя, с нами сущую, зряще, недоумеюще, взываем: «Кую Ти похвалу принесем, Заступнице усердная, яже источник благодатных исцелений пред пречистым Твоим образом с верою молящимся и Твоя помощи просящим всещедро источаеши и сице непрестанно нас милуеши?» Обаче, неисчерпаемая щедрота Твоя величающе, благодарственно вопием Триединому Богу: Аллилуия.

Икос 4

Слышавше ближнии и дальнии людие о пречудном явлении святыя иконы Твоя и о чудесех, от нея бываемых, со умилением в святую обитель Озерянскую притекаху и во всяких скорбех житейских и в дни нашествия иноплеменник в надежде спасения своего о Тебе, Всепетая Мати, уверяхуся, и, сице ликовствующе, Господа любовью прославляху. Темже и мы, надежду радости сея приемше, о Господе радуемся, Тебе же гласом хваления приносим таковая:

Радуйся, Агнице, рождающая Агнца, взявшего грехи мира, небесе и земли Царице и Владычице; радуйся, всех верных от зол ограждение и священное прибежище. Радуйся, благая утешительнице, нечаянную радость в святей иконе Твоей нам принесшая; радуйся, душ немощных целительнице, благость любви Божия нам открывшая. Радуйся, упование на милосердие Божие в сердца наша благодатно вселяющая; радуйся, теплотою любви Божественныя сердца наша оживотворяющая.

Радуйся, одушевленный Храме, великаго Царя Божественное жилище; радуйся, селение небесное, Херувим пребольшее и Серафим превышее.

Радуйся, благословенная в женах Богородице, светом любви Христовой нас озаряющая.

Кондак 5

Боготечней звезде икона Твоя, о Богомати, уподобися, егда святыя обители Озерянскую, Куряжскую и Харьковскую обтекаше и цельбоносными струями, неоскудно от нея источающимися, изобильно верных напаяше и, благодатию Святаго Духа тех оживотворяючи, телесне и душевне, по вере их, исцеляше. Мы же душевние очи наши к Тебе, Первообразу ея, возводим, недугов наших исцеления, грехов прощения и Небесным Утешителем душ наших посещения умильно просим, с верою вопиюще о Тебе Богу: Аллилуия.

Икос 5

Видевше икону Твою, Владычице, косою разсеченную и чудодейственно сращенную, и токи чудес от нея изливаемая, вси людие, со усердием к ней притекающе, Матерний покров Твой и защищение, надежду и умилоствление в ней разумеваху. Сице и мы, стрелами врага отсекаемии и волнами страстей потопляемии, душевне изнемогающе, в Тебе, о Всеблагая, надежду нашего спасения имуще, дерзающе молимся: услыши нас, грешными усты глаголющих Ти сицевая:

Радуйся, преблагая покровительнице града нашего,

Твоими бо молитвами роди христианстии спасаются; радуйся, всех греховне блуждающих на путь вечныя жизни добре наставляющая. Радуйся, от безумства, лени и страстей силою любви Твоея нас милостивно спасающая; радуйся, бедныя души наша, огнем Духа Святаго на подвиг любви согревающая и укрепляющая. Радуйся, всех под Твой покров и защищение матерне приемлющая; радуйся, в подвиге веры изнемогающих молитвам их внемлющая. Радуйся, болящия и безнадежныя от одра болезни возставляющая; радуйся, верная спутнице, путешествующих и по морю плавающих от всяких бед избавляющая.

Радуйся, благословенная в женах Богородице, светом любви Христовой нас озаряющая.

Кондак 6

Проповедник немолчен благодатныя помощи Богоматере явился человек некий, суху руку имый, иже со слезами умиления к иконе Ея святей припадая, удобь исцеление прият и о чудеси, на нем бывшем, с радостию и благодарением всей Церкви поведа. Мы же, имуще сию источник благодатных исцелений, наипаче же пред Престолом Божиим Заступницы нашея усердное за всех нас Матернее заступление, со дерзновением вопием любящему нас Богу: Аллилуия.

Икос 6

Возсия нам паче лучь солнечных святая икона Твоя, Владычице, в пределех Озерянских, егда губительная язва на страну нашу найде, и многи

острием смерти изсече. Людие же, гнев Божий видяще, со слезами умиления ко святей иконе Твоей, о Богомати, повергахуся, и не токмо православнии, но и иновернии, к источнику Твоего милосердия притекавшии с верою, исцеляхуся. Толику убо милость Божию Твоими Матерними молитвами на себе видяще, со благодарением воспеваху Ти таковая:

Радуйся, в дни мора язвеннаго непреложная наша надеждо и спасительнице; радуйся, всех в неудобь исцельных недугех страждущих премилосердная целительнице. Радуйся, ум наш, небрежением омраченный, благодатными струями, от иконы Твоея изливаемыми, озаряющая; радуйся, близ смерти сущия и душевне изнемогающия милостивно к жизни возвращающая. Радуйся, светлое благодати познание, о Тебе бо вся силы небесныя хвалятся; радуйся, надеждо благ вечных, Тобою бо земнороднии к жизни вечней приуготовляются. Радуйся, Мати Предвечнаго Бога, целебную радость верным источающая; радуйся, Честною Кровию Сына Твоего грехи мира омывающая.

Радуйся, благословенная в женах Богородице, светом любви Христовой нас озаряющая.

Кондак 7

Хотящи явити людем страждущим Твоея Матерния любви неисчерпаемую щедрот бездну, аки студенцы в пустыни знойней, чудотворныя иконы Твоя и новая знамения от них, о Богомати, даровала еси, да вси в болезнях душевных и телесных неисцельно изнемогающии и ко Твоему милосердию с верою

притекающие спасение обретают. Тако у иконы Твоея Озерянския немощнии и одержимии, исцеления душ и телес приемлюще, с веселием и благодарением воспеша Богу: Аллилуия.

Икос 7

Новую песнь хваления принесе Ти пажить Харьковская, Мати Врача душ и телес наших, егда некая слепая отроковица с материю своею слезныя молитвы у иконы Твоея Озерянския творящи, внезапно велиим гласом радования возопи: «О, мати моя! Свет Божий вижу, тьму непроходную очес моих просвещающий!» Людие же, видевше Твоего, о Богомати, благодатнаго врачевания силу, Твоему милосердию себе вверяху, с верою и любовью ко святей иконе Твоей припадающе, таковыми зываху похвалами:

Радуйся, источниче милосердия неисчерпаемый, неисцельных болезней врачевание содержащий; радуйся, всех оставленных врачами Твоею благодатною силою исцеляющая. Радуйся, дев благочестивых невестительнице и усердная о нас молитвеннице; радуйся, во искушениях и соблазнах житейских блуждающих ко спасению путеводительнице. Радуйся, звездо неугасимая, зрети Бога Вышняго нас просвещающая; радуйся, растления душевнаго и совести лукавства нас избавляющая. Радуйся, о Тебе бо матери и дщери и невесты Христовы надежду имуще, спасаются; радуйся, божественную радость и вечное спасение уповающим на Тя приуготовляющая.

Радуйся, благословенная в женах Богородице, светом любви Христовой нас озаряющая.

Кондак 8

Страшное и ужасное видение людем Божиим бысть, егда у святых иконы Твоя, Владычице, чудо велие и неизреченное совершися: девица бо некая, бесом томимая, хулу страшную на сию изрекаше, обаче молитв ради Святых Церкви, наипаче же Твоего предстательства силою, от своего лукавства спасена бысть и на славословие Твое, Пречистая, подвижесе. Мы же радуемся и веселимся, яко не посмеются о нас враги наши, ниже погубит нас Господь грех ради наших, молитвами Твоими. Сего ради, благодаряще, о Тебе вопием Богу: Аллилуия.

Икос 8

Вся в вышних пребывающи и нижних, к лику Твоему святому припадающих, никакоже оставлявши, Богородице. Се бо человек, духа злаго имый, с верою моляся пред пречистым Твоим образом Озерянским, Владычице, исцелен бысть и в радости душевной о благодеянии, на нем бывшем, благодарение Тебе принесе. С ним же и на нас, о Всеблагая, во время благопотребно посети и от ловления диаволя души наша сохрани, да не постыдимся, ниже посрамимся, приносяще Ти сицевыя похвалы:

Радуйся, яко именем Твоим, паче всякаго имени, пленения диаволя и всея силы вражия человецы свободяются; радуйся, яко призывающии имя Твое от клеветы человеческия и внезапныя смерти Тобою

избавляются. Радуйся, бедствующим на всяком месте всеусердная предстательнице; радуйся, за обидимых, озлобленных и уничиженных присная ходатаице. Радуйся, Ты бо кающихся грешников из челюстей духов злобы изымаеши; радуйся, Ты бо всех на Тя уповающих в любовь Божию вводиши. Радуйся, красотой девства Твоего воспевати величие Божие нас научающая; радуйся, рождением Сына Твоего грозное смерти жало притупляющая.

Радуйся, благословенная в женах Богородице, светом любви Христовой нас озаряющая.

Кондак 9

Вси сущии в бедах, болезнях и печалех, радостно восхвалим святую заступницу нашу Богородицу, обретшую благодать у Бога, во еже недужныя исцеляти, немощныя укрепляти, плененныя свободдати и страждущия от духов нечистых и прочих бед избавляти. Темже, яко несомненной предстательнице нашей, умильно глаголем Ти: помози и научи нас, о милосердствующая Мати, волю Божию всегда творити, и пребывати в любви Его, и, яко кадило благовонное, непрестанно приносить Ему: Аллилуия.

Икос 9

Ветии многовещаннии недоумеют, что глаголати о Тебе, Мати Божия, видяще тайну необъемлемую и величие неопикуемое святаго лика Твоего, Дево Чистая, даром чудотворений сияющаго и всех, припадающих к нему с верою, цельбоносными дарами снабдевающаго. Мы же, неисчетная

благодаяния сия вѣдуще, аще и от скверных устен наших, обаче умиленною душею и сердцем сокрушенным, дерзаем воспевати Тебе сия похвалы:

Радуйся, Отца Небеснаго благоволения предображение, кающихся грешников милосердием Божиим снабдевающая; радуйся, едина Мати милосердия, вдов и сирот милующая и питающая. Радуйся, на горе Афонстей, Почаевстей и в иных обителях иконами Твоими преславно чудодействующая; радуйся, новую купель Силоамскую в пустыне Озерянстей верным на утешение источившая. Радуйся, иноков благоподвизающихся к отечеству Небесному верная предводительнице; радуйся, супружеств христианских благословение и чад их преблагая покровительнице. Радуйся, Церкви небесная присное радование, земная же от всех козней вражиих непреодолимое избавление; радуйся, в вечном Царствии Сына Твоего радости неизреченная верным уготовление.

Радуйся, благословенная в женах Богородице, светом любви Христовой нас озаряющая.

Кондак 10

Спасительное прибежище и Твоего предстательства уверение, и милосердия Твоего явление икона Озерянская нам, Владычице, показася, пред неюже души наша в молитве изливаем и верою Тебе вопием: воззри, Милосердая, на люди Твоя, вся скорби наша и печали утоли, утешение благое в сердца наша низпосли, и спасение вечное душам нашим,

Пречистая, испроси, да спасаеми Тобою, Сыну Твоему и Богу нашему благодарно зовем: Аллилуия.

Икос 10

Стену тверду и от бед ограждение, противу козней диавольских спасительное прибежище, недугов исцеление и ины дары многи в святей иконе Твоей, Владычице, обильно даровала еси нам. Сию благоверный христороубец, иже ушесы своими зело страдаше, в трикратном явлении виде, со умилением к той припадая, благодатнаго исцеления сподобися. Тако видяще любве Твоея, Богомати, неисчерпаемое море, дерзающе, молимся: услыши нас убогих, грешными усты глаголющих Ти сицевая:

Радуйся, Предвечнаго Царя родительнице, Церкви Православныя забрало и ограждение; радуйся, народа нашего от бед хранительнице, и от всех врагов избавление. Радуйся, наша всеусердная благодетельнице, паству Харьковскую матерински опекающая; радуйся, цвете небеснаго благоухания, благодатным миром сердца наша растворяющая. Радуйся, незримая предстательнице, Ты бо воистину крепость наша и спасение; радуйся, благоутробная и милостивая к человеку, болезней наших надежное исцеление. Радуйся, благая хлебодательнице, дождями ранними и поздними землю нашу напояющая; радуйся, от враг видимых и невидимых, возстающих на ны, нас избавляющая.

Радуйся, благословенная в женах Богородице, светом любве Христовой нас озаряющая.

Кондак 11

Пение всеумиленное приносим Ти, Всемиловитая Владычице! Не вемы бо, что сотворим, егда внезапно найдет на нас страшный час смерти. На Тя все упование наше возлагаем, и к Твоей святей иконе, юже на утешение нам даровала еси, припадающе, просим: буди милостива к нам грешным и не презри молений наших, но всели в сердца наша печаль по Бозе Спасителе нашем, да пламенною любовью зовем Ему: Аллилуия.

Икос 11

Светозарную свещу, во мраце жития сущим неугасимую зрим святую икону Твою, Всенепорочная, Твоего милосердия источник, благодать всем источающий, у него же мнози грешницы, кающиеся, спасение улучиша и Твоим ходатайством Царствие Небесное обретоша. Помози и нам, Всемиловитая, да Твоими Матерними молитвами с мудрыми девами царствию Христову приобщимся, идеже, веселящися, вопием Ти таковая:

Радуйся, приятное молитвы кадило, за спасение мира у престола Святыя Троицы присно благоухающая; радуйся, органе молитвы неумолкающая, милосердия Божия миру просящая. Радуйся, равноапостолов и проповедников евангельския истины благодатное вдохновение; радуйся, верных иерархов Церкви Христовы правило веры и от скорбей избавление. Радуйся, храмов Божиих усердных строителей и верных в них служителей любовь Христовою обогащение;

радуйся, трудолюбивых земледельцев хлебом жизни вечныя насыщение. Радуйся, божественною красотою Сына Твоего и Бога нашего непрестанно наслаждающаяся; радуйся, Его же, яко Судию и Бога, о спасении мира неотступно умоляющая.

Радуйся, благословенная в женах Богородице, светом любви Христовой нас озаряющая.

Кондак 12

Благодати Твоя земное знамение дати восхотевши, источник чудес неисчетных пажити Харьковстей в иконе Твоей Озерянской отверзла еси, Владычице, в ней бо Божественная благодать, еюже Всевышний облагодатствова Тя, знамения и чудеса выну содевает и душевных и телесных недугов исцеление всем с верою притекающим подает. Темже и нам благодати сея помощь у Сына Твоего, Пречистая, испроси, да не погибнем люте без покаяния, но, Тобою спасаемии, немолчно поем Богу: Аллилуия.

Икос 12

Поюще любви Твоя бездну неизреченную, юже изливаеши роду христианскому, благодарно припадающе, молим Тя, Богородице: яко в животе сем, тако и в страшный час смерти не остави нас, но ускори на помощь и, яко воистину Мати Божия и над всеми владычествующая, от лютых мытарств и руки бесовския души наша исхити и Сыну Твоему и Богу нашему спасены приведи, да, якоже на земли, тако и на небеси, со всеми святыми воспеваем Ти таковыя похвалы:

Радуйся, щедрот бездно, от начала веков во

главизну нашего спасения предъизбранная; радуйся, источнице любви неизреченная, яко Мати милостивая, Страстотерпцем голгофским указанная. Радуйся, у Креста Сыну Своему сострадавшая, и с Ним мир возлюбившая; радуйся, Церковь Сына Твоего от всех зол избавляющая, род христианский возвеличившая. Радуйся, цвете девства неувядаемого, венец всех добродетелей в Себе сплетшая; радуйся, радугу Божественного знамения, небесная и земная у Престола Божия Собою совокупляющая. Радуйся, всесвятый бо лик Твой, благодатию и жизнью дышущий, яко рай Божественный на Тя взирающим; радуйся, превыше Небес превознесенная, отрадо и утешение непрестанно Тя величающим.

Радуйся, благословенная в женах Богородице, светом любви Христовой нас озаряющая.

Кондак 13

О Препоблагословенная Мати Христа Бога нашего, Церкви Небесная украшение, земная же щит и утверждение, всем во всяких скорбех Матернее заступление и среди соблазнов мира сего благодатное душ наших озарение! Приими, Владычица, сие убогое моление наше, пред пречистым образом Твоим Тебе приносимое, и умоли всеблагаго Бога явити милость Свою на ны и на народы наша, во еже в силе и благодати Духа Святаго всякое зло препобеждая, николиже в любви Божией не насытитися и тако чистым сердцем zde и в будущем веце воспевати святых Святейшее Слово: Аллилуия.

(Этот кондак читается трижды, затем икос 1 и кондак 1)

Икос 1

Архангел Гавриил, спасение наше предвозвещающая, благословенную в женах пронарече Тя, Богородице. Мы же, благовестнику Бога Вышняго внемлюще, велию таинству дивящися, радуемся, Тя, знамение лика Своего Озерянского нам даровавшую, Матерь Господа нашего исповедуем и, яко Матери милосердия и щедрот, со благоговением вопием Ти:

Радуйся, священное сокровище славы Божией, свещеносно во Святая Святых введенная; радуйся, благоволения Божия предображение и человеков спасения проповедание. Радуйся, пророческих проречений сбытие многоценное, Христа всем предвозвестившая; радуйся, о Тебе бо Небесная вся удивишася, зряще Духа Святаго в Тя всельшася. Радуйся, главизно нашего спасения, Триипостасное Божество в едином естестве всему миру явившая; радуйся, Отроча Младо, Отчее Сияние, мир просветившее, нам родившая. Радуйся, Мати Пречистая, прежде рождества и по рождестве Дева пребывшая; радуйся, яко о рождестве Сына Твоего вси земнороднии, спасающися, возвеселишася.

Радуйся, благословенная в женах Богородице, светом любви Христовой нас озаряющая.

Кондак 1

Взбранной Воеводе, невечерняго Света Родительнице, Божественное знамение спасения – Христа Богомладенца – на руку Своею держащей, молитвам Церкви земная внемлющей, струи животворныя от явленных иконы Своея Озерянския

всем верным источающей, благодарственная восписуем Ти раби Твои, Богородице. Но яко имущая державу непобедимую, от всяких нас бед свободи и щедротами Сына Твоего души наша озари, да зовем Ти:

Радуйся, благословенная в женах Богородице, светом любви Христовой нас озаряющая.

Молитва

О преблагословенная Владычице наша Богородице! К Тебе, обретшей благодать пред Богом, во еже родити миру Спаса душ наших, и Матери Света нареченней, припадающе, молимся: призри, Всемиловитая, на нас, предвечным советом Пресвятыя Троицы, к благодатному наследию жизни вечныя созданных, жалом же греховным уязвленных и смерти телесней и душевней поверженных, и, якоже святую икону Твою Озерянскую, пречудне срастивши, всем верным источник чудес от нея источила еси, сице же и нас, на Твою, Богомати, икону, благоговейно взирающих, душевне и телесне исцели и немощное естество наше, сечением греховным разсекаемое, паки с Богом соедини и чадами Его Божественныя любви силою и действием Святаго Духа соделай. Сердца же наша, Всемиловитая, благодатию Христовою раствори, и волю нашу ко исполнению заповедей Божиих спешну сотвори, ноги же наши на путь мирен направи. И тако, о Всеблагая, все естество наше любовью к Богу воспламени.

Владычице Пресвятая, якоже в тяжком нашествии иноплеменник в пределы наша святою иконою Твоею Озерянскою православныя люди укрепляла еси, тако и ныне знамением лика сего пресвятаго паству харьковскую и вся верная чада страны нашея в единомыслии веры утверди и от тлетворных расколов и ересей злочестивых и иных бед сохрани, Отечеству же нашему незыблемаго мира от Бога испроси и от всех враг, мыслящих нам злая, нас избави. Верных же Твоих, пред святою иконою Твоею припадающих и в скорбех Тебе молящихся, прошения исполни, и вся яже ко спасению потребная всем нам даруй. Убогия же слезы и воздыхания наша благоприятны пред Богом сотвори и прощение грехов наших испроси. И тако, Препоблагословенная Мати, воздвигни нас на благодарственное Ти славословие, и, в подвиге покаяния нас укрепляючи, неосужденны причастники Пречистаго Тела и Честныя Крове Господа нашего Иисуса Христа по кончине жития нашего быти нас милостивно сподоби. В час же исхода нашего молитву Матернюю о нас пред Богом сотвори и бедныя души наша чрез мытарства лютыя, начала и власти тьмы невозбранно в Царствие Небесное, идеже мир и радость безконечная, приведи, во еже в Церкви Небесней, Тобою, честнейшею Херувим и славнейшею без сравнения Серафим, украшенной, непрестанно славословити и воспевати смерти Победителя, Агнца Божия, взяшаго грехи мира, Емуже, о Благодатная, Тебе ради, осанна и благодарение, слава, честь и поклонение, со Безначальным Его Отцем и со Пресвятым, Благим и

Животворящим Духом Утешителем, ныне и присно, и
во веки веков. Аминь.